

**REGIONAL NEWS BULLETIN
HEADLINES (EVENING)**

Date – 08/04/2025

Time - 18:30 hrs

1. Larsap, General (Retd) Vijay Kumar Singh-a'n kumin Republic Day Camp New Delhi a neihah Mizoram atanga tel te'n fak an hlawh hle a ti.
2. National Tribal Youth Festival chu State Tribal Resource Centre, Kelsih-ah vawiin tlai khan hman tan a ni.
3. Prime Minister Narendra Modia chuan MUDRA Yojana chu ramchhunga ngawi renga sum thawkchhuaktute dinhmun thlakthlengtu tiin a fak.
4. Supreme Court chuan Tamil Nadu Governor R.N Ravi-an state Assembly a pass tawh bill 10 lai President pawmpuina la thei loa a ti khawtlai lui tlat chu dan kalh leh dik lo hulhual a nih thu a sawi.

<><><>

GOVERNOR

Larsap, General (Retd) Vijay Kumar Singh-a'n kumin Republic Day Camp New Delhi a neihah Mizoram atanga tel te'n fak an hlawh thu leh amah ngei pawhin fakna thu a dawn nasat thu a sawi.

Vawiina Govt. T. Romana College (GTRC) leh 1 Mizo Bn. NCC tangkawpten Govt. T. Romana College NCC te hlawhtlinna lawmna leh NCC cadet-te chawimawina hun an buatsaihah, a hmanpuinaah he thu hi sawiin, Larsap chuan Govt T. Romana College NCC ten hlawhtlinna an neihte chu thawhhona tha an neih vang tih sawiin, NCC chu hna hmuhna mai piah lamah mihring chhawrtlak leh tha zawka chherchhuaktu a ni a ti a, NCC cadet ten armed forces-ah luh theihna tha tak an neih thu sawiin, NCC te chu hemi tinzawna theihtawp chhuah turin a fuih a. Kumin Republic Day Camp New Delhi a neih zawh takah khan Mizoram atanga tel te'n fak an hlawh thu leh amah ngei pawhin fakna thu a dawn nasat thu sawiin, Mizoram NCC hmalakna chhuanawm a tih thu leh hemi kawnga Col SS Kalia leh a thawhpuite inpekna fakawm a tih thu sawi a ni.

Byte: Governor

Thla hmasa March ni 25- a Guwahati-a North East Region huamchhunga NCC titha 'Best Educational Institutes for NCC NER 2024-2025' lawmman sem takah khan Govt. T. Romana College (1 Mizo Bn. NCC) chu Mizoram College zinga NCC kalpui tha ber 'Best NCC College in Mizoram 2025' atan thlan a ni a. Nikum khan he chawimawina hi lo dawng tawhin a kum zawna an dawnna a ni.

Hemi bakah hian an College zirlai Junior Under Officer (JUO) Jacksy Lalhlimsangi chu Best Cadet NCC NER 2024-25 hnuaiyah Silchar Region, Girls (Army wing & others) category-ah cadet tha bera thlan a ni bawk. Govt. T. Romana College NCC (1 Bn. Mizo NCC) hi August ni 4, 2003 ah din a ni a. Cadet 1860 bawr vel zir chhuak tawhin tunah hian cadet 80 an nei mek a ni.

<><><>

PWD MINISTER

PWD Minister Pu Vanlalhlanan Kaladan Multi-Modal Transit Transport Project (KMMTTP) leh PMGSY III ROAD, Diltlang 'S' - Chawngte 'P' kawngpui sial mek chu a tlawh a,

Pu Vanlalhlana chuan KMMTTP chhak lama NHIDCL ten NH-54 kawngpui an laihah lei vung an paih fimkhur tawh loh avanga harsatna awm thin chu veiawm a tih thu a sawi a. Tun dinhmunah hmun thenkhata kawng tlabal leh chhezual lai chu chak taka siamthat mek a ni chu lawmawm a tih thu sawi a. Sawrkarin kawng tha a ngaipawimawh tih tarlangin, kawngpui siamthat hna thawktu ABCi - te pawh tha leh rintlak taka hnathawk tura chahin, KMMTTP Road enkawl mektu MPWD te pawh theihtawp chhuah turin a chah nghal bawk.

PWD Minister hian sawrkarin kawngpui tha neih a duh avanga a hmun ngeia kal a nih thu a sawi a, PMGSY III Road, Diltlang 'S' - Chawngte 'P' hnathawk mektu Contractor- te chu an hnathawh uluk tur te, mipuite mamawhna hriaa, tha leh rintlak taka hnathawk turin a chah a ni.

Minister hi Dy. Speaker Pu Lalfamkima, Adviser to Chief Minister Dr. Lorraine Lalpekliana Chinzah Lawngtlai East bialtu MLA ni bawk bakah Pu T Lalhlimpaia,

Lunglei West bialtu MLA, leh Pu C. Ngunlianchunga, Lawngtlai West bialtu MLA ten an tawiawm a ni.

<><><>

NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalakna in National Tribal Youth Festival chu State Tribal Resource Centre, Kelsih-ah vawiin tlai khan hman tan a ni. Ni 4 awh Festival hi Chief Secretary Pu Khilli Ram Meena chuan a hawng a ni. He festival chhung hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, state thenawm Nagaland leh Manipur atangin artist te an rawn tel a, Zirtawpni bik hi Naupang te pual bika hun buatsaih a ni. Kan corr report lo ngaithla ang.

<><><>

UNION MOS HOME

Union Minister of State for Home Affairs Pu Nityanand Rai-a chuan vawiin khan Mizoram rawn tlawh turin Aizawl a lo thleng a,

BJP hruaitu, BJP Mizoram State Prabhari Pu Devesh Kumar leh State President Pu Vanlalhmuaakaten lo hmuakin, vawiin tlai khan Republic Venga BJP State Office ah thuthar thehdarhtute a kawm nghal a,

Pu Nityanand Rai-a chuan, Prime Minister Narendra Modi chuan ram a kaihhruai hnuah hmarchhak bial tihmawsawn chu a thupui ber a ni a ti a, Look East leh Act East policy te a kalpui a, kum 2014 hma lam nena tehkhinin hmarchhak bial chuan hma a sawn hle a ni ati.

Railway pawhin Sairang a lo thleng dawn a, zirna leh damdawilam pawhin hma a sawn hle a, Union Home Minister Amit Shah pawh lo kalin, sorkar hotute nen inkawmin, sector hrang hranga hmasawna turin puiah a tiam a ni a ti bawh.

Tun tumah hian Prime Minister Narendra Modi ngen angin Mizorama MADC leh CADC tlawh turin a lo kal a, thawktute hmalakna leh chetvelna a enpui dawn tih a sawi a bawh.

<><><>

LUNGLEI WATER SCARCITY

Lunglei khawpuiin tui harsatna nasa tak an tawh avangin vawiin khan Lunglei PHE Deptt chuan Lunglei khawpui chhunga Tuikhur tui tih thianghlim dan inzirtirna PHE SE Conf. Hall-ah a buatsaih a,

PHE EE Pu V.Laldanmawia chuan he hun hi kaihhruaiin Lunglei khawpui chhungah tui a harsat avangin tuikhur tui an chawi nasa a, mahse an tuikhur tui a thianghlim lo vek a, hei hian natna hrang hrang a thlen theih avangin harsatna thleng thei laka o inhmakhua nan he hun hi buatsaih a ni a ti. EE chuan tun dinhmunah Lunglei khawpuiin a tlan tuikhur zawng zawng in natna hrik a pai vek a, chuvangin tui chhuahso a chlorine telh thin a pawimawh tih a sawi a, tuikhur hnar ah ranin, ekin leh bawlhhlawh pah te sim a ngai a ni a ti.

Sr.Chemist Pu Lalnghakliana chuan tui tlantute him nan an tui tlan te a zing thei ang berin Laboratory a test thin tur a ni a ti a. Tui tih thianghlim nan chhuanso, chlorine pawlh te a tha tih a saw ai. Lunglei tuikhur dinhmun sawiin tuikhur 87 ah natna a awm tih hmuhchhuah a ni a ti.

He hunah hian Veng tin atangin Local Council te Sub.Hqtrs YMA aiawh leh MJA te an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM MUDRA

Prime Minister Narendra Modia chuan MUDRA Yojana chu ramchhunga ngawi renga sum thawkchhuaktute dinhmun thlakthlengtu tiin a fak. Vawiina MUDRA Yojana kum 10 tlinnaah PM Modia chuan a tupawh sum thawhchhuahna lama hmasawn tumte chu tanpui a, an than zel theihnan boruak tha tak siam zel a tum tih a sawi a. Pu Modia chuan Pradhan Mantri Mudra Yojana, dawngtute chu a zatve chu SC, ST leh OBC an nih thu a sawi bawk a ni. He scheme hian mitin huapa hmasawna thlen leh sumpai dinhmuna zalenna thlen chu a tum zingah a tel a ti bawk. Prime Minister Modia hian a chenna inah MUDRA Yojana dawngtute kawmin ramchhunga entrepreneur tam takin an theihna phochhuah nan an hman thu a sawi a. He scheme hnuaiah hian cheng vaibelchhe nuai 33 chuang mipuite hnenah pek tawh a nih thu a sawi a ni.

<><><>

TAMIL NADU

Supreme Court chuan Tamil Nadu Governor R.N Ravi-an state Assembly a pass tawh bill 10 lai President pawmpuina la thei loa a ti khawtlai lui tlat chu dan kalh leh dik lo hulhual a nih thu a sawi. Justice J.B Pardiwala leh Justice R.Mahadevan te awmna bench chuan he thubuai hi ngaihtuahin State assembly in bill a pass nawn tawh hnua President pawmpuina la tur a lo ti khawtlai thei lo tiin a rel a. Governor hnenah a vawi hnih nana bill pek a nih tawh chuan a pawmpui ngei tur anih thu a sawi a. Ram danpui Article 200 na in a sawi angin Governor-in bill ti khawtlai turin thuneihna a hranin a nei lo tih sawiin Chief Minister leh Council of Minister te thurawn angin a thawk tur a ni tiin a rel a ni.

Tamil Nadu Chief Minister M K Stalin chuan Supreme Court thurel chu Tamil Nadu tana thil chhinchhiahtlak tak anih thu leh ramchhung hmundanga state sawrkarte tan pawh thu lawmawm anih thua sawi a ni.

<><><>